

2024
LETTRE
DE MONSIEVR LE MARESCHAL
DE RANZAV,
GOVVERNEVR DE DVNQUERQVE,
A MONSEIGNEVR LE DVC
D'ORLEANS.



A PARIS,
Chez ROLIN DE LA HAYE, au Mont Sainct
Hilaire, rue d'Escoffe.

M. DC. XLIX.
AVEC PERMISSION.

LETTRE
DE MONSIEUR LE MARÉCHAL
DE RANZAV,
GOUVERNEUR DE DANONVILLE,
A MONSIEUR LE DUC
D'ORLÉANS



A PARIS
Chez Rolin de la Haye, au Mont d'Or,
Hôtel de Clugny.

M. DE KILIX
AVEC PERMISSION

L E T T R E
DE MONSIEVR LE MARESCHAL
de Rantzau, Gouverneur de Dunquerque, à
Monseigneur le Duc d'Orleans.



ONSEIGNEVR,

Voyant approcher le temps de la campagne, en laquelle apparemment les ennemis viendront m'attaquer dans cette place, & que Monsieur le Cardinal ne daigne respondre aux deux dernières Lettres que ie luy ay escrittes; Ie m'adresse à vostre Altesse Royale, pour la supplier tres-humblement de donner les ordres necessaires à la conseruation d'un dépost si pretieux, que ie n'ay pû ny deu confier à d'autres, non pas mesme durant vne partie de cét hyuert, parce qu'il est trop cher & trop considerable au Roy; & que ie suis resolu de le luy conseruer si soigneusement, qu'il ne me sera iamais raty que par ma mort.

Et c'est sur ce dessein, Monseigneur, que ie luy ay declaré ouuertement la resolution que i'ay prise, de ne point enuoyer vne partie de cette garnison contre Paris, quelque instance qu'il m'en ait faite, ny d'abandonner vne conqueste si glorieuse à vostre Altesse, & au bonheur de Monsieur le Prince.

Ie ne doute point que Monsieur le Cardinal trouuant à son goust vne des Loys de ce fameux Legislatteur d'Athenes, par laquelle il auoit ordonné punition contre ceux qui ne prenoient aucun parry; & que mon refus l'ayant touché sensiblement dans la passion qu'il a pour la vengeance, il n'ait fait des efforts extraordinaires pour me perdre aupres de la Reyne; & mesme que m'estant vn peu estendu en ma dernière, pour luy decouurir mes sentimens en hōme de bien, sur les diuers sujets de tant de reproches dont il est accablé, il ne tâche encore par toutes sortes d'artifices de me ruiner dans l'Esprit de vostre Altesse.

Mais si j'estois asseuré que cette Lettre fust tombée entre vos mains, je serois certain que vous y trouveriez dequoy iustifier ma resolution, puisque vous y verriez à peu près, Monseigneur, ce que i'ay crû estre obligé de luy mander, depuis la perte fatale de Courtray, avec vne intention toute pure, pour le bien de sa reputation, mais beaucoup plus encor pour celuy de l'Estat; & s'il a fait entendre quelqu'autre chose à la Cour, ie n'en suis point l'auteur.

A ij

Après luy auoir donné plusieurs aduis des menaces & des nouueaux desseins des ennemis, & sur tout, des manquemens que ie remarque en nos places voisines, ie le priois de persuader à la Reyne, que ma presence estoit necessaire en cette Frontiere, & de considerer luy-mesme, qu'estant en France, ce que luy & moy nous y sommes, ie ne pouuois fauoriser son dessein en allant commander contre la capitale du Royaume, sans danger pour l'Estat, & sans imprudence pour moy, puisque c'eust esté pour faire éclater plus hautement l'auidition & la haine que la nature inspire contre les estrangers parmy toutes les nations.

Il est vray, Monseigneur, qu'il m'est eschappé quelque legere marque de la douleur que i'ay sentie, non seulement de ce qu'en cette occasion si importante, & en laquelle il hazarde la perte de l'Estat, il a trouué trop de facilité en vostre Altesse, & trop de feu dans l'esprit de Monsieur le Prince, pour eschauffer vn party qui a esté formé si à contre-temps, & qui d'abord excita contre l'vn & l'autre vn murmure si general; mais ç'a esté, Monseigneur, sans sortir des termes de mon deuoir, & sans blesser en façon quelconque le respect qui m'est inuiolable enuers le Sang Royal.

La nature vous a fait naistre avec trop de douceur, & vous a rendu trop amoureux de la prosperité de ce Royaume, pour vouloir approuuer le sentiment de Tibere, qui estimoit bien-heureux le vieux Priam, d'auoir veu mourir avec luy les richesses & la beauté de son pays, & l'on peut bien dire que si vostre Altesse Royale auoit en moins d'affection pour cet autre homme qui la possede si absolument, elle n'auroit iamais laissé tout oser & tout entreprendre à la violence & à l'ambition du Cardinal. Celuy-cy s'est imaginé que ie n'auois rien de meilleur à luy persuader que la continuation d'une guerre qui a lassé toute l'Europe, & qu'il n'estoit ny bien-seant ny glorieux à vn homme de ma profession, de luy représenter des voyes plus douces & plus legitimes que celles qu'il a prises & qu'il a suivies, pour la durée de sa fortune.

Il a creu qu'il n'appartenoit qu'à luy de raisonner sur les maximes de la plus excellente politique, & que i'estois ou trop ignorant ou trop temeraire, pour toucher à la sublimité de sa science.

Mais ie n'ay pas laissé de luy dire qu'il ne deuoit iamais donner atteinte aux loix & aux maximes du Royaume, ny choquer en aucune façon les premieres puissances; qu'il deuroit enseigner au Roy par sa conduite, que les Souuerains doiuent porter leurs sujets dans leur sein, & non pas les fouler aux pieds; que dans sa profession, de laquelle il a banny la pieté, encore qu'elle en doire estre inseparable, il deuoit auoir appris que l'Illustre conducteur du peuple choisi, & que les plus doctes appellent l'Arbitre de Dieu enuers les hommes, n'a iamais institué de loy ny de punition, sans faire priere à son

à son Maître, ny sans luy demander sa volonté; que ce diuin homme assure les Rois que leurs Sceptres & leurs Couronnes n'ont point de plus ferme appuy que celui des Loix, & que ceux qui regnent bien, regnent long-temps. Que les Perses faisoient mourir ceux qui faisoient des loix nouvelles; & que l'usage des Locres, les obligeoit de venir la corde au col, lors qu'ils en presentoit de pareilles, afin qu'ils fussent estranglez dès l'heure qu'elles auroient esté trouuées mauuaises.

Cependant, Monseigneur, toute la France ne manque pas de iuger, si celui qui a voulu passer pour le Conducteur ou le premier Ministre de ce grand Estat, en a vû de cette sorte, & s'il a iamais creu, que ceux qui recherchent avec ambition la puissance de regner iniustement, ne voyent iamais que par vn faux iugement l'vtilité des choses, sans regarder la peine des loix qu'ils violent, ny l'infamie qu'ils encourent, & qui est le plus insupportable de tous les chastimens; elle voit maintenant si l'abstinence des Princes, de ceux qui gouvernent & de ceux qui les environnent, nourrit l'affection des peuples, & si les Estats peuuent auoir de meilleurs fondemens que la concorde; si l'y vaut mieux conseruer sa reputation par l'amour de la justice, que de la perdre, en mettât au hazard la ruine generale; si la plus dâgereuse peste & qui cause plus de mal en la vie humaine, n'est pas de feindre la connoissance avec laquelle on veut exécuter quelque dessein pernicious; elle connoit enfin si celui qui ne sçait faire la guerre non plus que la paix, est digne du secours, de la protection & de la flaterie des Grands.

Comment est-ce, ie vous supplie, Monseigneur, que ce Ministre peut respirer sans crainte, & viure sans douleur, s'il est vray que la malice boit elle-mesme la plus grâde partie de son venin? Car y a-t'il vn homme au monde plus mal-heureux en sa reputation que celui cy? Et si l'on dit que Cesar menaçoit autrefois Neptune de luy faire abolir ses sacrifices, à cause qu'il se trouuoit mal-traitté sur mer par les orages, ne semble-t'il pas que celui dont le monde ne parle au iourd'huy qu'avec horreur, ait mesme entrepris la ruine des choses saintes, & que la licence qu'il donne par tout, n'attaque pas moins la diuinité que les biens & la liberté de tous les Ordres? Ignore-t'il que sa retraitte est nécessaire, & qu'il peut encore la faire avec la conseruation de sa vie & celle des biens qu'il emporte? ou bien veut-il enfin que cet auenglement que luy cause le faste & l'orgueil, nous fasse tomber d'vn mesme pas avec luy dans le precipice qu'il ne pourra plus eschapper?

Se doit-on estonner si celui qui cherche sa perte, travaille à celle des autres; si celui qui est ennemy de son propre repos, n'a point d'objet plus delicieux que les tourmens du genre humain? Combien cette humeur est-elle contraire à celle de ce sage Areopagite, lequel ne respirant que la tranquillité publique, reprochoit tousiours au

Senar d'Athenes, qu'il ne signoit iamais de traité de paix qu'avec des robes de deuil? Mais qu'elle difference peut-on faire du genie & de la conduite de nostre Ministre avec celle du tyran Basilide, qui pour assouvir sa conuoitise barbare, vouloit que ses subjects les Moscovites luy apportassent en forme de tribut des verres pleins de leurs propres sueurs? Je ne parle point, Monseigneur, de la perte publique dût la France vient d'estre affligée par la mort de Mr de Chastillon, de qui la valeur m'estoit si connue & la bien-veillance si chère; ie ne dis rien de celle de Monsieur de Clancieu, de qui la generosité & l'industrie au fait de la guerre, n'ont pas esté moindres que son mal-heur: ny de tant d'autres qui s'estoient signalez par leur service aux grandes occasions. Je ne touche rien non plus de la barbarie du peuple Anglois, de qui le Prince legitime laisse à estudier apres sa mort, & aux Souuerains les regles du vray gouuernement, & aux subjects cette soumission & ce respect que la Sageſſe diuine leur ordonne de garder enuers ceux qu'elle a establis pour ses Lieutenans, c'est à dire, Monseigneur, pour les Protecteurs & les Peres des Peuples.

Mais enfin, ie laisse la voix libre au public, à qui on ne la peut oster ny pour donner ses louanges aux gens de bien, ny pour faire entendre ses plaintes sur les desordres que l'on fait commettre contre l'innocence & la sainteté mesme.

L'on dit que les rouës du chariot de Pharaon demurerent longtemps en veuë sur le riuage de la mer, pour marque d'une punition si fâcheuse.

Cet exemple a plû sans doute à Monsieur Mazarin autant que celui d'Angleterre est cruel, odieux à tous les autres Peuples, & tout à fait contraire à l'usage & aux loix fondamentales de la monarchie Francoise, où les Roys ont tousiours esté & seront eternellement les delices de leurs subjects. Et sans doute, Monsieur le Cardinal n'a pas assez fait de reflexion sur cet amour, qu'il a entrepris d'irriter par cet esloignement du Prince, ou bien c'est qu'il scauoit que c'estoit l'unique moyen pour tout perdre, & qu'il en auoit le dessein.

Quoy qu'il en soit, Monseigneur, il est certain que son humeur est telle, que si quelque chose le fâche, c'est que sa puissance n'a pas autant d'estendue sur la mer que sur la terre, comme celle de Dieu, ayant peut-estre ouy dire que ceux qui gouernent les hommes, doiuent paroistre & viure parmy eux comme des Dieux; mais s'il se trouble, c'est parce que tout autant d'hommes qu'il voit, ne courent point à sa deffense, & qu'il apprend que tous ceux qui naissent, ne viennent pas au monde tous armez, cōme ces enfans de Lacedemone, qui sortoient du ventre de leurs merès avec des formes de lances marquées sur leur costés. Il n'a garde de se contenter à la façon des Perses, en faisant fouetter seulement les vestemens des condamnés. La Clemence qui couronne la Vertu & la Reputation des Héros, n'a iamais pû trouuer de place en son esprit. Depuis le tēps qu'il

domine, la foy, qui est tousiours fondée sur la Iustice, & qui est vne constance & vne verité inuiolable des choses qui sont promises, ou pour le bien public, ou pour l'vtilité particuliere, ne sera tantost plus conuë ny gardée en ce Royaume, si les maximes de cét homme n'en doivent estre bannies; & cela, Monseigneur, à la gloire des infideles & à la honte des Chrestiens. Vostre Altesse sçait mieux que moy, que la plus parfaite gloire de quelqu'un consiste en l'amour que luy porte la multitude, en la confiance qu'elle a en luy, & en l'honneur dont elle l'estime digne avec vne certaine admiration de tout ce qu'il fait: que cét amour du peuple, procede principalement de l'opinion qu'il a de la liberalité, de la iustice & de la fidelité des plus grands hommes, & qu'elle est enfin la plus asseurée gardienne de la felicité des Princes.

Pour vne marque eternelle d'une punition tres-rigoureuse de l'esprit humain qui ne voulut pas se contenir lors qu'il le pût, maintenant qu'il voudroit bien iouyr de ce parfait repos qu'il trouua dès le premier moment de sa creation, il n'en a plus la liberté ny le pouuoir; il se sent diuersifié par maniere de dire dans la varieté de ses desirs: de sorte qu'en mesme temps qu'il entre en quelque repos, il cherche à se donner du tourment & des inquietudes, & puis se trouuant agité dans la crainte des euenemens facheux, & dans la difficulté des affaires, vne honteuse inconstance le rappelle au repos, duquel il n'a pas si-tost commencé de iouyr, que par ce mouuement déreglé qui le trouble sans cesse, il est prest de retourner dans les employs au bruit qu'il se figure d'entendre & dont le monde le seduit.

Cette maladie est contagieuse & commune à toute la race des hommes; mais il faut auoüer, Monseigneur, que les Estats sont bien mal-heureux qui tombent en des mains, en qui la vertu & la science n'ont iamais esté employées pour tascher du moins à guerir cette foiblesse, à qui l'ambition & l'auarice commandent au englement, qui ne laissent rien eschapper pour accroistre les biens & la grandeur particuliere de quelque famille; & par qui enfin nous voyons embrasser si laschement les soins de la fortune publique.

Au reste, Monseigneur, l'on a iuste sujet de craindre, si mes sentimens ne me trompent, que la Politique par laquelle nostre Ministre a mises les affaires, où elles sont, ne luy ait pas fait exactement considerer quelles sont les forces & la nature de l'ennemy qu'il attaque. Oüy, Monseigneur, j'ose croire que les tromperies de l'erreur l'ont emporté, puis qu'il ne s'en trouue point de plus farouche, qu'il n'est pas moins redoutable que vil, qu'il est d'autant plus à craindre qu'il n'écoute point de raison en ceux qui ont affaire à luy, qu'il ne peut estre adoucy par aucune reflexion sur l'équité, ny fléchy par les prieres, ou par les remonstrances des plus sages; Car ce monstre qui est le ven-

tre d'une populace affamée, ne pardonne dans sa fureur, ny aux choses diuines, ny aux puissances humaines.

Jugez si il vous plaist, Monseigneur, du coup qu'il peut faire, si l'on deslie ses chaines, & si la dernière necessité oblige ceux qui le retiennent de luy lascher vne fois les mains qui le captiuent.

C'est alors qu'emporté par la rage du desespoir il diroit plus resoluement, que les grands Capitaines ne disent à leur soldats sur le point de combattre; il est enfin necessaire d'aller, d'où il n'est pas besoin de retourner; & c'est ainsi que ie me figure de le voir marcher contre son ennemy à la façon d'un fleuve débordé, & qui fait prendre la fuite aux ames les plus fermes & les plus assurées.

En repassant dans l'Esprit de vostre Altesse Royale, Monseigneur, la bonté, la magnificence, & les delices de Paris, qui est le noble cœur de ce grand Corps maintenāt agité dans toute son estendue; de grace, qu'elle daigne se souuenir de la cruauté du iugement qui fut rendu contre l'Illustre Pucelle, par quelle race de gens, & avec quelle douleur vn veritable François cria, iniustice, lors que ce beau corps estant reduit en cendre, on trouua son cœur tout entier.

Mais sans m'arrester à faire d'application, il est temps que ie laisse aux belles lumieres du grand Esprit de vostre Altesse, à inger de tout ce qu'elle voit que ie voudrois bien dire en cet endroit; & que ie la supplie tres-humblement à la fin de cette Lettre, qu'il luy plaise de ne condamner pas tout d'un coup des sentimens que mon zele m'inspire sans passion, & que ma franchise me fait conceuoir sans enuie; de me croire touiours fidele & touiours près à mourir pour le seruice de l'Estat.

De vouloir faire en sorte que ie luy puisse conseruer ma vie avec les moyens de conseruer au Roy cette place si importante, & si digne de jalousie; de m'honorer tousiours de la protection de vostre Altesse auprès de la Reyne, contre les mouuemens & les desseins d'un homme que ie n'ay iamais offensé; mais sur tout, ie la conjure qu'en détournant vn orage qui peut aneantir toutes les conquestes du Roy & desoler tout le Royaume, elle ne souffre plus que l'on vsurpe sur l'Esprit de la Reyne, l'Autorité Souueraine, avec laquelle vous pouuez ensemble & dès maintenant, donner le repos à la France, procurer la tranquillité, à plus de la moitié de l'Europe, & peut-estre vn iour le Salut à la Chrestienté.

Ce sont les vœux que fait pour la gloire immortelle de vostre Altesse Royale,

Son tres-humble & tres-obeissant

A Dunquerque ce 26. Feb. 1649.

seruiteur RANTZAV.

Il est permis à Rolin de la Haye, d'imprimer la Lettre cy-dessus, avec desensés à tous autres de l'imprimer. Fait à la Chambre des Dépêches le 3. Mars 1649.